

lauff/ vnd Verueff zuvorderst in Gottes Forcht / Zucht vnd Erbarkeit /
 neben Ehrlichen Geschäften / in abgetheilten Jahren / Monaten / Wo-
 chen / Tag vnd Stunden zubringen / auch endlich ihr Leben Christlich
 vnd seelig beschliessen mögen; Derowegen / vnd die Liebhabere bey disen so
 holdseelig: vnd hochnützlichen Astronomischen Künsten zu gratificiren,
 So habe ich abermahlen / auß dem / vor disem nunmehr offte benambseten
 meines lieben Herren Vatters Joseph Gartenbachs des Eltern / Manna-
 haften Kunstspiegel / noch ein anmütiges Stücklin entlehnet / dasselbige
 von Wort zu Worten heraus copirt / In was gestalt beneben gar ring-
 ferttigem modum, wiewolen vnansichtbar: gleichsam nur einer hülhern
 Schiffel ähnlichen / aber doch wol practicieretes vnd im werckh selbstn ge-
 recht erfundenes Instrument / die Cuba genandt / ohne sonderbares stu-
 dium, noch vil Kopff verbrechens / ein recht just gehende Sonnenuhr an
 jede Wand oder Maur (. wie krafft / oder vngestalt auch dieselbige immer
 seyn möchte .) durch ein gemeine PriuatPerson / vnnd gar behend hinan
 geworffen / oder abgetragen kan werden / massen dann hernach folgende
 beschreibung neben drey hierzu woldienlichen Kupfferstücken grundtlich
 werden zuerkennen geben.

Das Kupfferblatt N: E. Die Erste Figur.

Wie man durch ein sonderbares Instrument /
 Cuba concaua, oder Halbaußgehölzte Kugel / an ein jede
 Wand oder Mauren / wie schräg / oder vngestalt dieselbige auch
 immer seyn möchte / ein gerechte Sonnenuhr gar behänd
 auftragen könne.

Wann man demnach ein gar grosses Werckh mit allen . 12. bemer-
 ckenden himelischen Zeichen / beneben den dardurch lauffenden
 Zodiacum, von einer recht wolgestellten Sonnenuhr an ein Kir-
 chen / Pallast / Thurn oder Privathaus / wolte außzeichnen / so muß man
 hierzu gleichfalls / ein woltauglich vnd bequemes Instrument gebrauchen: